

Egna dallas unicas bibliotecas «trilingas»

Gion Nutegn Stgier/FMR

Siva da 37 onns dattigl la Biblioteca Beiva-Surgôt. Per la part soura da Surses è chella en'anritgeida. Gabriela Habicher resta er pigls proxims dus onns presidenta dalla biblioteca.

Aint igl Grischun è la Biblioteca Beiva-Surgôt egna dallas pitschnas bibliotecas tgi dat. Per la populaziun digl li turistic agl pe digl Gelgia e cunzont er pigls giasts è la biblioteca en'anritgeida. Ultra da chegl è la Biblioteca Beiva-Surgôt egna dallas pacas bibliotecas «trilingas» tgi dat aint igl Grischun. Agls Bivians ed allas Bivianas, agls abitants ed abitantas dallas otras quatter vischnancas da Surgôt, Rona, Mulegns, Sur e Marmorera ed agls giasts da Beiva stattan a disposiziun 1200 codeschs per amprestar. Per amprest porchia la biblioteca codeschs an tudestg, taliang e rumantsch. La Biblioteca Beiva-Surgôt sa drezza a persungas da tot las vigliadetas tgi ligian gugent e savens.

Averta durant 102 deis – 4,81 codeschs per de

Dalla radunanza generala da venderde passo ò Gabriela Habicher, la presidenta dalla Biblioteca Beiva-Surgôt detg igl suan-

dont: «Nossa pitschna biblioteca trilinga è anc adegna betg ena instituziun da sensaziun, pertge ella veiva betg d'occurrências spectacularas, mabagn da noss lectours e lectouras fidevels e fidevelas.» Digl schaner anfignen igl december 2024 è la biblioteca stada averta 102 deis.

An chels 102 deis on 327 persungas visito la biblioteca. Amprestos èn nias 491 codeschs, chegl tg'èn 4,81 codeschs per de, u 1,50 codeschs per visitader. Igl domber da commembers e commembras e donatours dalla Biblioteca Beiva-Surgôt schea tar 73 ed è aint igl rom digls davos onns.

Sustign annual digl cumegn da Surses

Igl chint annual 2024 dalla biblioteca sera cun en deficit da passa 1000.00 francs tar sorteidas ed antradas da 10800.00 francs. La somma dallas contribuziuns annualas monta a 3070.00 francs. Igl cumegn da Surses ò er igl davos onn sustignia la Biblioteca Beiva-Surgôt scu gio er igls davos onns cun ena somma da 6000.00 francs.

Generous anvers la biblioteca èn er adegna l'Ovra electrica Beiva (EW Bivio) ed alloura la gruppa da teater da Beiva. La contribuziun digl cantun chella sa drezza tenor la somma investida per novs codeschs. Gl'onno passo ò la biblioteca da Beiva e da Surgôt cumpro no-

vs codeschs per ena somma da 1400.00 francs. Igl preschaints e las preschaintas dalla radunanza generala on decidia da betg dulzar las contribuziuns annualas. La commembranza singula costa 20.00 francs, famiglias e pèrs paian 35.00 francs e donatours aglmanc 50.00 francs e daple.

Siva da 12 onns presidenta

Per commembers e commembras dalla Biblioteca Beiva-Surgôt è igl amprest da codeschs gratuit. Otras persungas paian per amprest 2.00 francs per codesch. An tavla èn er stadas las elecziuns dallas persungas tgi stattan agl timung dall'organisaziun dalla biblioteca. Gabriela Habicher, ella tg'è siva da 12 onns presidenta dalla biblioteca è neida reeligeida per ulteriours dus onns an chel uffezi. Siva da 26 onns ena cassiera fidada è Silvia Lozza.

Er ella è neida confirmada an chel uffezi pigls proxims dus onns. Bibliotecara ed actura resta venavant er per dus onns Christine Besek. La donna tgi s'angascha fitg per la biblioteca ò detg tgi la dumonda per codeschs stampos an ena scritgira pi gronda e pi bagn ligibla seia realitad. Sen fundamaint da chel aspect ins vign a vurdar schi dat en schinumno instrumaint da liger, tg'ins savess er amprestar.



Las treis donnas tgi stattan alla testa dalla Biblioteca Beiva-Surgôt. (da san.) Silvia Lozza, Gabriela Habicher, Christine Besek.



La biblioteca trilinga sa catta a Beiva gist davos la baselgia reformada.

Fotos Gion Nutegn Stgier